

Monday, May 26, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

CORPSES TRANSPORTATION

Social Welfare Minister Pi Lalrinpuii’n nikum september ni khat atanga sawrkarin ruang 666 a phurh man cheng nuai 70 sing 8 sang 8126 pek ani tawh tih a sawi.

Pi Lalrinpuii chuan social media kaltlangin he thu hi tarlangin Nikum September ni 1 aţangin Sawrkarin ruang a phurh tawh zat chu mi 666 a ni a. cheng nuai 70 sing 8 sang 8126 pek ani tawh tih sawiin Mi 84 phurhna man cheng nuai 10 sing 2 sang 6550 chu tunkarah pek leh tura ruahman a ni tih a sawi.

Tarlan tawh angin Mizoram sawrkarin kum 2024 september ni 1 atanga ruang phurh man bill a pek sak theih hnuah dilna a lut tam tawh hle a, sawrkar chuan budget a siamah cheng vbch 5 chu ruang phurhna atan ruahmanin ruang phurh man chu mithi chhungten buaipui tawhlo in a phurtu ambulance emaw motor ten Social Welfare Directorate ah an buaipui tawh dawn a, Department hotute sawi danin online a dil theih turin Ruang phurh Application buatsaih mek a ni bawk.



CM IN DELHI

Chief Minister Pu Lalduhoma’n DoNER Minister Pu Jyotiraditya Scindia hnenah Thenzawl khua chu DoNER hnuaia Global Model Site atana thlan anih avangin lawmthu a hrilh.

Nimin khan Pu Lalduhoma chuan Pu Jyotiraditya Scindia chu Delhi-a a chenna inah hmu in hmasawna hrang hrang an sawi dun a, Chief Minister hian Thenzawl khua chu DoNER hnuaia Global Model Site atana thlan anih avangin lawmthu a hrilh a. Thenzawl Golf Course thuam thaa international standard a siamna tur proposal kal mek chu sawipuiin Union Minister hian a lo bawhzui tur thu a lo hrilh a ni.

Mizoram thlai tharchhuah a bikin sawhthing leh Mizo hmarchate te hralhna bakah Sports sector tihhmasawn kawngah Mizoram chu theihtawp a lo chhuahpui tur thu Union Minister hian a lo sawi bawk a. DoNER hnuaia Mizoram hmachhawp hrang hrang te pawh an thlir ho bawk.

Nimin vek khan Chief Minister hian Union Minister for Minority Affairs Pu Kiren Rijiju chu New Delhi-a a chenna inah a hmu a, Mizorama PMJVK hnuaia project pawimawh zual te en dunin, hmalak zel dan tur te a sawipui a ni.

Chief Minister hi Sports & Tourism Minister Pu Lalnghinglova Hmar, Lok Sabha MP Pu Richard Vanlalmangaiha leh sawrkar mi pawimawh ten an tawiawm a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



HEALTH MINISTER AT MJA FREE CLINIC

Health Minister Pi Lalrinpuui'n Mizoram Universal Health Care Scheme (MUHCS) chu thil tha tak a nih thu sawiin natna a awm chiahin a pawimawh zia leh a thatzia a langchhuak thin tih a sawi.

Vawiina Doctor's Seminar Hall, Aizawl Civil Hospital-a Mizoram Journalists Association General Headquarters member te tana a thlawna inentirna buatsaih a hawnnaah he thu hi sawiin Minister chuan mipui vantlang Golden Card neilo te tan cheng 2500 in a in ziak lut theih a, cheng nuai 5 thleng an bill thei tih sawiin cheng 5000 a in ziak lut ten cheng nuai 5 thleng bill theiin semi-private ward-ah te an awm theih thu a sawi a. Cheng sing 1 a in ziak lut te chuan cheng nuai 5 bill thei mahse private hospital-ah pawh private ward-ah bill theih a nih thu a sawi a. Pensioner ten cheng nuai 12 thleng an bill theih thu sawiin sorkar hnathawkte chuan Central Healthcare Scheme ang thovin tawp chin awm loin an bill theih thu a sawi a ni. Minister chuan simplified referral system private hospital ten an la zawm ve theih rih loh deuh avangin awlsam taka refer case an neih theihna turin an siam tih a sawi a. Hetah hian MUHCS hnuaiah specialist doctor in damlo a enin refer ngai a nih chuan state pawnah a refer nghal theih dawn thu a sawi a ni.

Byte of Health Minister

Minister chuan Civil Hospital tihchangtlun zel a nih thu sawiin lung enkawlina tur Cath Lab buatsaih mek a nih thu a sawi a. Hei bakah hian kal thlak an tih theih tep tawh thu leh lung zaina pawh ZMCH-ah buaipui mek a nih thu a sawi a. Thluak zaina pawh neih thuai an inbeisei thu a sawi bawh a ni.

MJA Free Clinic hi vawiin atanga tanin tun thla ni 30 thleng buatsaih a ni dawn a. Hawnna inkhawmah hian MJA President Pu C. Lalrambuatsaiha pawhin thu sawiin Aizawl Civil Hospital in chanchinbumite hriselna an ngaihpawimawh sak chu lawmawm a tih thu a sawi a ni.



Police Training School (PTS), Thenzawl Principal kalchhuak Ruatsanga Ralte chuan vawiin atang khan Sr. Superintendent of Police, Traffic, Aizawl hna zawmin, pisa a luah a tan a. 1st IR Bn. Commandant Lalthakima Ralte chu PTS Principal-in a awm thung ang.

Aizawl Traffic Sr. SP thar Ruatsanga Ralte chuan Aizawl khawpui traffic thunun leh dan kengkawh kawngah ngaihtuahna thar seng tlang turin a thawhpuite a sawm a, a thawhpui tur te chu a tan mithar an awm loh thu chakna lai leh chak loh na lai inhriatpui tawn sa an nih avangin thawhhona tha leh thil tha zawk a chhuah zel a beisei thu a sawi bawk.



PARLIAMENTARY DELEGATION

Congress MP Shashi Tharoor chuan India in Pakistan ramri kaltlanga firfiakte dona kawngah inhnamhnawiha pawl khawih tute chu hrem ngei an ni dawn tih a sawi.

He thu hi New York, United States-a vantlang inkhawmna ah sawiin All Party Delgation hruaitu Pu Sashi Tharoor chuan Pakistan ramri kaltlanga India mi leh sa ten awlsam taka firfiakte chetna an tawrh thin chu a awm tawh dawnlo a ti a, hemi kawnga inhnamhnawih te chu en liam an nih loh tur thu leh hremna an chungah pek anih tur thu a sawi.

Sawrkhar laipui chuan India in Pakistan rawlrara chetna hrang hrang a chhan let dan bakah an hmalakna an thlawp theih nan ram hrang hrangah MP kaihhruaiin aiawh a tir a, Team hrang hrangah inthenin ram hrang hrang an tlawh a ni.

